

Nukissiorfiit aktianik piginneqatigiiffinngorlugit allanngortinneqarnissaa pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat, Siumut)

Akissuteqaat

(Ineqarnermut, Attaveqarnermut Angallanermullu Naalakkersuisoq)

Siullermeerneqarnera

Inatsisartuni Siumup ilaasortaaitai Nukissiorfiit aktianik piginneqatigiiffinngorlugit allanngortinneqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuummik saqqummiussaqqarput.

Naalakkersuisut isumaat malillugu Siumumiit Nukissiorfiit aktianik piginneqatigiiffinngorlugit allanngortinneqarnissaat pillugu Naalakkersuisut peqquneqarnissaannik Inatsisartut aalajangiiffigisassaattut siunnersuut Nukissiorfiit ingerlatsinerannut pitsaanagerusunik atugassaqartitsilernaviangilaq. Naalakkersuisut matumani oqaaseqaateqarlutik tamanna nassuiaateqarfigissavaat.

Aqutsineq

Nukissiorfiit maannatut iluseqarlutik isumannaatsumik toqqissisimanartumillu aquneqartut Naalakkersuisut isumaqqarput. Ullumikkut Naalakkersuisut Nukissiorfiillu akunnerminni pitsaasumik pilersitsiviusartumillu oqaloqatigiittarput.

Ullumikkut politikkikkut ingerlatsinermilu akisussaaffiit ersarissumik avissaarsimatinneqqarput. Naalakkersuisut politikkikkut akisussaasuupput, Nukissiorfiit ulluinnarni ingerlatsinermut akisussaaffik isumagisaraat, kiisalu suliniuteqarnermut akisussaaffik Naalakkersuisoqarfiup Nukissiorfiillu aqutsisuisa akunnerminni suleqatigiinnermikkut akisussaaffigalugu. Ullumikkut Nukissiorfinni aktianik piginneqatigiiffimmi akisussaaffiit assinginik ingerlatsisoqareersoq oqartoqarsinnaavoq, tassami akisussaaffik siulersuisunut qullersaqarfimmullu agguataagaavoq.

Nukissiorfiit inuiaqatigiinni pingaaruteqarluinnartut inissisimapput. Taamaattumik suliffeqarfimmut politikkikkut sunniuteqarsinnaanerup ingerlaannarnissaa pingaaruteqarpoq. Tamanna Nukissiorfiit suliffeqarfittut imminut ingerlattutut ingerlatiinnarneratigut pitsaanerpaamik isumagineqarsinnaavoq.

Aningaasaliissutit

Aalajangiiffigisassatut siunnersuummi Nukissiorfiit aktianik piginneqatigiiffinngorlugit allanngortinneqassappata, Nunap Karsia ukiumi tulluuttuni pingasuni sisamaniluunniit ukiumut 3-400 mio. koruuninik sipaagaqartarsinnaasoq erseqqissarneqqarpoq. Nukissiorfiit aktianik piginneqatigiiffittut Nunap Karsia avaqqullugu nammineerluni taarsigassarsinnaalernissaa tamatumunnga pissutaasoq aalajangiiffigisassatut siunnersuummi oqaatigineqqarpoq.

Nunap Karsia ukiumut 3-400 mio. koruuninik sipaagaqarsinnaalissasoq ilumuunngilaq. Taarsigassarsititsineq aningaasartuutaanngilaq, kisiannili tassarpiaavoq taarsigassarsititsineq Nunap Karsia aningaasat erniaat ilanngullugit utertittussaallugit. Taamaattumik Nunap

Karsia Nukissiorfinnut taarsigassarsititsinermini pissarsiaqartarpoq, erniat killilikkat Nunap Karsianut iluanaarutaasarmata.

Aningaasaliinissamut aalajangiinerni siunissamut ungasinnerusumut aningaasaliinissamut pilersaarusiorterit tunngavigineqartartussaapput, soorlu ullumikkut tamanna pisareersoq. Siunissamut ungasissumut aningaasaliinissamut pilersaarusiortarnermi Nukissiorfiit Naalakkersuisullu ukiuni ataasiakkaani aningaasanut pilersaarut malillugu taarsigassarsiassatut pisariaqartinneqartut ilisimareertarpaat. Taamaalilluni Nukissiorfiit suliffeqarfittut imminnut ingerlattutut aningaasaqarnikkut naapertuuttumik isummernerit tunngavigalugit, aammalu aktianik piginneqatigiiffinnut piumasaqaatit assingi tunngavigalugit aningaasaliinissaat taarsigassarsinissaallu qulakkeerneqartarpoq.

Suliffeqarfiup aktianik piginneqatigiiffittut ingerlanneqarnissaanut naleqqiullugu Nukissiorfiit suliffeqarfittut imminnut ingerlattutut akigititaasa appasinnerunissaat ilimanarpoq. Akit appasinnerunerannut pissutaavoq Nukissiorfiit Nunap Karsianut taarsigassarsinermini, Nukissiorfiit Nunap Karsia avaqqullugu taarsigassarsiniarnissaannut naleqqiullugu taarsigassarsinissamut piumasaqaatit pitsaanerusut angusinnaammattigit. Nunap Karsia Nukissiorfinningaaniit aningaasanik atortissallugu tatiginassuseqarnerummat tamatumunnga pissutaavoq.

Ingerlatsineq

Nukissiorfiit aamma Tele Greenland A/S imminnut naleqqiullugit assersuutissallugit naapertuutinnigilaq, suliffeqarfiit taakku aningaasartuutaasa ilusaat assigiinngitsuummata.

Nukissiorfinni pilersuineq annertuumik qularnaassuseqarpoq, pissutigalugu suliffeqarfiup tunisassiai innuttaasut inuuniarnerannut pingaaruteqarmata, tamatumani innaallagissiorfinnik sillimmatinik innaallagissamik tunisassiorsinnaasunik peqarnissaq pisariaqarpoq. Ingerlatsinermi sillimmateqarneq pissutigalugu Nukissiorfiit tunisassiorsinnaanerit ulluinnarni ingerlatsinermi pisariaqartinneqartup marloriaatingajaanik annertussuseqarpoq. Tamatuma kingunerisaanik kilowatttime-mut tunineqartumut ataatsimut aningaasartuutit qaffasissorujussuupput.

Tele Greenland A/S-ip suliaanut teknologi akimigut appariartortoq tunngavigineqarpoq, tassani Tele Greenland A/S-ip neqeroorutigisartagai tunisassiat arlallit pilerigineqarnerat annertusiartorluni. Tamatuma peqatigisaanik suliffeqarfiup tunisassiaminit qinigassaatinu amerlissallugit periarfissaqarpoq. Tele Greenland A/S-ip pisinnaasaminik atorluaaneruneratigit ilaatigit oqaloqateqarnermi minutsimut ataatsimut akiusoq appartinneqarsinnaasimavoq.

Nukissiorfiit aktianik piginneqatigiiffittut allangortinneqassagaluarpata imaanngilaq Namminersorlutik Oqartussat ingerlatseqatigiiffimmuut aningaasatigit tapersiisariaarutissasut imaluunniit ikiorsiisariaqalissanngitsut. Tamannami ungasinngitsumi Royal Greenland A/S-ip aningaasaataasa 500 mio. koruuninik ilaneqarneranni kingullermik takoreerparput.

Nukissiorfiit ullumikkut angisuunik ingerlataqarnerup iluaqutissartaannik atorluaareerput, tassami aningaasaqarnikkut teknikkikkullu qaffasissumik pitsaassusilinnik suliaqarsinnaasumik qullersaqarfeqarput. Nukissiorfiit aktianik piginneqatigiiffinngornermikkut angisuunik ingerlataqarnerup iluaqutissartaannik annertunerusunik pissarsinaviannngillat.

Naatsorsuutit

Nukissiorfiit aktianik piginneqatigiiffinngortinneqarnermikkut naatsorsuutininik saqqummeeriaatsinik pitsanngortitsingaatsiartussaasut imaluunniit naatsorsuutininik

saqqummiussisarnermi suleriaasissat suut atorneqarsinnaaneriniq ersarinnerulersitsisinnaasut Naalakkersuisut isumaqatiginngilaat.

Nukissiorfiit naatsorsuutaat ukiumoortumik naatsorsuusiortarnermut inatsimmut assingusut malillugit suliarineqartarput. Taamaattumik tikkuarneqartut Nukissiorfiit aktianik piginneqatigiiffingornerminni naatsorsuutiniq saqqummiussisarnerat annertunerusumik pitsannguuteqarnaviangilaq. Tamanna pissutigalugu Nukissiorfiit naatsorsuutiniq saqqummiusseriaasiat ersarereerpoq. Kiisalu ullumikkut Nukissiorfiit aktianik piginneqatigiiffinnut maleruagassat assingi tunngavigalugit naatsorsuusiussanerlutik namminneerlutik aalajangersinnaavaat.

Inerniliineq

Taamaattumik aalajangiiffigisassatut siunnersuut taparserneqassanngitsoq Naalakkersuisut inassutigaa.